

Datum: 31.10.2023.

Broj: 02-06-1059

BIH TREBA ISKORISTITI NOVE SIGNALE IZ EU ZA PROCES PROŠIRENJA ZA KLJUČNE REFORME KA DEMOKRATIZACIJI I BORBI PROTIV KORUPCIJE

Sarajevo, 31. oktobar 2023. godine – Obnovljen interes EU za proces proširenja za zemlje Zapadnog Balkana trebalo bi da posluže kao **podsticaj za ubrzanje suštinskih reformi**, prije svega na polju demokratizacije i jačanja vladavine prava, poručeno je na konferenciji „EU Integracijski Forum“ koja je danas održana u Sarajevu u organizaciji Transparency International u BiH.

Umjesto dosadašnjih deklarativnih opredjeljenja za integraciju, lideri zemalja regiona bi trebalo da pokrenu čitav niz **hrabrih ali nužnih koraka** u cilju što jače pravne, političke, ekonomske ali i razvojne integracije, poručeno je sa konferencije.

“Vrijeme je za proširenje ali je na Bosni i Hercegovini da poduzme neophodne korake i pokrene reforme ka daljoj integraciji sa Evropskom Unijom” istakao je **Adebayo Babajide** zamjenik šefa Delegacije Evropske unije u BiH na otvaranju konferencije.

Tokom panel diskusija učesnici su konstatovali da BiH bilježi **stalno pogoršanje** u brojnim oblastima kao što su vladavina prava i korupcija koja je zbog zarobljenosti pravosuđa i drugih institucija postala skoro nekažnjiva. U isto vrijeme u zemlji su sve prisutniji **autoritarni trendovi** kroz zakone kojim se narušavaju osnovna ljudska prava i slobode što je najvidljivije u Republici Srpskoj gdje je kleveta vraćena u okvire krivičnog zakonika uz najave još rigoroznijih zakona koji će suzbiti rad medija, nevladinih organizacija i pojedinaca koji nisu pod kontrolom vlasti.

Sve ovo ukazuje da se BiH nalazi u stanju institucionalne zarobljenosti i na **granici osnovne funkcionalnosti** zbog čega je sposobnost odgovora na izazove pregovaračkog procesa sa EU dovedena u pitanje.

“Postojeća disfunkcionalna struktura upravljanja u BiH teško će moći odgovoriti na izazove pregovaračkog procesa” izjavio je Srđan Blagovčanin na otvaranju konferencije dodavši da je BiH još uvijek nema usvojen program integrisanja što pokazuje da je postojeći **mehanizam koordinacije u potpunosti je nefunkcionalan**.

Konferencija se takođe bavila i pitanjem izazova koji stoje pred samom EU koja prolazi kroz najduži period od kako nije primljena niti jedna nova članica i za koju su se učesnici složili da je **zrela za reforme** po pitanju modela unutrašnjeg funkcionisanja kako bi kreirala dovoljno privlačan prostor za političku i ekonomsku integraciju zemalja sa kojima graniči kao što su zemlje Zapadnog Balkana.

Na konferenciji, koju je Transparency International u BiH organizovao uz **podršku Kraljevine Švedske** prisustvovali su Adebayo Babajide, zamjenik šefa **Delegacije Evropske unije** u Bosni i Hercegovini, Birgitta Jansson, predstavnica Ambasade Švedske u BiH, Srđan Blagovčanin, predsjedavajući Upravnog

odbora TI BiH te regionalni stručnjaci iz oblasti vladavine prava, EU integracija, predstavnici domaćih institucija i međunarodnih organizacija, organizacija civilnog društva, akademske zajednice i medija.